


天一閣藏明代方志選刊

建寧府志

重脩建寧府志序

嘉靖辛丑春三月建寧府



貳郡石涌謝侯邦信過嵩請曰
郡之有志所以資政治也今校
讎就緒梓刻告完子郡人也可
無一言引其端乎嵩以學識荒
蕪固辭不獲乃告之曰志史之

流也禹經九州周叙職方春秋
列國之史官漢唐宋輿地之圖
謀皆志類也夫風俗之淳漓政
治之得失山川之險易人才之
盛衰非有以志之後將奚徵焉
故孔子以夏殷之禮能言而有
杞宋不足徵之歎則志書之作

可少後乎建寧禹貢楊州之域
星紀牛女分野至秦始入屬郡
由漢歷宋幅員益廣迨我

皇明統一寰宇是郡居八閩上游
遠連浙西近瞰江右山川竒拔
毓秀鍾靈真儒篤生上承洙泗
名臣疊出遠匹臯夔如三胡朱

蔡道統之傳五劉章楊事功之
盛他郡鮮能及也是故匪志以
紀之則何以表先哲示楷範明
教化端士風以紹美前聞乎郡
舊有志歲入殘闕弘治壬子郡
守松江劉侯璵禮聘儒彥因前
守安成劉侯鉞舊草損益成集

歷今五十年脫畧未備觀者病
焉嘉靖丁酉郡守常熟夏侯王
麟銳意脩述爰付郡人謝州牧
純編纂刊刻夏侯尋以述職去
不克校正貳郡婺源汪侯玩以
是舉不可中止乃白於建寧道
東麓汪公佃成之且請據事直

書斯爲實錄汪公以爲然遂命
儒職朱君幸鄉舉楊君垚滕君
鶴齡黃君封張君雲漢楊君應
詔重加攷訂取舍仍裁決於汪
公凡訛者正之遺者補之繁者
刪之不經者汰之脫稿間適新
守餘姚王侯正思至未及入梓

東麓以擢官去汪侯以考績去
王郡守亦以述職去事遂寢行
嗚呼斯志之成其難有如此者
豈將有所待耶庚子秋石梁郝
公維嶽持憲是道以郡志久湮
靡所披究乃屬謝侯彙次鋟行
侯時綰郡符遂加裁定乃付梓

人板刻之凡館穀楮穎謄寫諸
費皆自己出一毫不擾於民工
畢予諦觀焉見其秩而有序約
而不遺其事核其詞正其文質
取予之公條貫之備發凡舉例
之審他志未能或之先也竊嘗
論之郡之有志猶國之有史也

志與史體雖少殊而作史者每
於志采錄焉則志是亦史也昔
人謂作史有三長而志亦不可
缺一則志豈易言哉故繁則複
簡則遺文銜則誣溢美則誕皆
不足以言公也是編不徇己私
不昵親比質諸載籍之公咨以

見聞之實使一郡八邑之跡歷
千百年之遠皆可按籍而得謂
非志之善歟史之義歟嵩家食
有年茲際郡書告就旣獲附名
其間而復繆數語於末簡豈非
幸耶卷計二十有一凡山川疆
域風俗城池戶口田賦學校選

舉人物宦蹟之類纖悉不遺可
謂詳且明矣其有裨於治化豈
淺淺哉是役也人更數手歲歷
五霜非得吾郝公以主之謝侯
以成之恐不免於中輟矣雖然
郝公首先教化整飭吾邦百度
貞肅而是志特加意焉可謂識

其大者謝侯遠器清才博洽明
練不再月而墜典復全皆可紀
也第嫌於見任故他善政不敢
贅云

嘉靖二十年孟夏之吉

賜進士嘉議大夫南京工部右侍
郎在告前都察院右副都御史

奉

勅巡撫四川等處地方
甌寧范嵩
拜書

建寧府志序終

重脩建寧府志序

郡邑志類古國史而實不同史
載列國刑賞舉錯祀戎朝聘盟
會之典志則紀郡邑封域沿革
民俗土宜秩官體統百凡之制
列國之政日新不窮而郡邑之
制一定無改史辭積久漸繁志

文靡所加益故曰志與史異唯
人才盛衰職官更代小有增紀
者爾建居八閩上游溪山清駛
秀拔實為雄郡而志獨缺弘治
壬子郡守雲間劉侯璵始因前
守安成劉侯鉞遺草成編然粗
畧未備迄今幾五十年板刻殘